

Stór hugbúnaðarverkefni í Danmörku og Svíþjóð

Helstu niðurstöður:

- Heildarhagnaður í ársfjórðungnum var 15 mkr.
- EBITDA 123 mkr í fyrsta ársfjórðungi.
- Afkoma innanlands góð, en rekstur erlendis undir áætlun.
- Stöðugur vöxtur og góð afkoma af sölu á Tempo hugbúnaði frá TM Software.
- Applicon A/S afhenti stóra SAP lausn fyrir sjúkrahús í Danmörku.
- Vaxandi eftirspurn eftir tæknilausnum Nýherja.

Þórður Sverrisson, forstjóri:

„Hagnaður Nýherjasamstæðunnar er tæpar 15 mkr á fyrsta ársfjórðungi 2012 og EBITDA er 123 mkr og er afkoma nokkuð lakari en var í fyrsta ársfjórðungi árið 2011. Afkoma af innlendum rekstri er ágæt, en afkoma af erlendri starfsemi er undir áætlun. Um síðustu mánaðamót afhenti Applicon A/S nýtt SAP hugbúnaðarkerfi til rekstrar fyrir sjúkrahús á Sjálandi eftir tveggja ára innleiðingarvinnu.

Vaxandi eftirspurn er eftir tækniþjónustu hjá Nýherja hf. og sala á eigin hugbúnaðarlausnum hjá TM Software. hefur aukist mikið, innanlands og erlendis. Einkum er mikill vöxtur í sölu á Tempo tímaskráningarkerfi TM Software.“

Rekstrarniðurstaða á fyrsta ársfjórðungi 2012

Ársfjórðungsyfirlit – Lykiltölur Fjárhæðir í þús. króna					
	F1 2012	F4 2011	F3 2011	F2 2011	F1 2011
Seldar vörur og þjónusta	3.817.545	4.304.520	3.505.552	3.977.088	3.692.686
Vörunotkun og kostnaður við selda þjónustu	(3.051.191)	(3.455.284)	(2.844.276)	(3.206.653)	(2.871.896)
Framlegð	766.354	849.236	661.276	770.435	820.790
Aðrar tekjur	0	2.439	1.292	2.724	6.422
Rekstrarkostnaður	(698.160)	(757.187)	(658.500)	(704.165)	(730.251)
Virðisrýrnun viðskiptavilda	0	(124.281)	0	0	0
Rekstrarhagnaður / (-tap) (EBIT)	68.194	(29.793)	4.068	68.994	96.961
Hrein fjármagnsgjöld	(66.760)	(58.114)	(48.943)	(68.545)	(48.099)
Hagnaður / (tap) fyrir tekjuskatt	1.434	(87.907)	(44.875)	449	48.862
Tekjuskattur	(966)	(4.270)	9.480	1.069	(11.946)
Hagnaður / (tap) tímabilsins	468	(92.177)	(35.395)	1.518	36.916
Rekstrarliðir færðir beint á eigið fé	14.381	1.971	(24.705)	12.828	26.731
Heildarhagnaður / (-tap)	14.849	(90.206)	(60.100)	14.346	63.647
EBITDA	123.080	155.811	76.641	140.109	159.587
EBITDA hlutfall	3,2%	3,6%	2,2%	3,5%	4,3%
Meðalfjöldi stöðugilda	520	538	536	528	528

- Sala á vöru og þjónustu nam 3.818 mkr á fyrsta ársfjórðungi samanborið við 3.693 mkr á sama tímabili árið 2011 og jókst því um 3,4%.
- Meðalfjöldi stöðugilda á fyrsta ársfjórðungi 2012 var 520 en var 528 á sama tíma í fyrra.

Uppgjör Nýherja hf. á fyrsta ársfjórðungi 2012

- Rekstrarkostnaður var 698 mkr, sem er 32 mkr. lægri en á sama tíma í fyrra.
- Hagnaður fyrir afskriftir, fjármagnsliði og skatta - EBITDA - var 123 mkr í ársfjórðungnum en var 160 mkr á sama tímabili árið 2011.
- Heildarhagnaður í fjórðungnum nam 15 mkr. Heildarhagnaður í fyrsta ársfjórðungi 2011 nam 64 mkr.

Efnahagsreikningur 31.03. 2012 – Lykiltölur		
Fjárhæðir í þús. króna		
	31.03. 2012	31.12. 2011
Fastafjármunir	4.423.283	4.279.964
Veltufjármunir	3.598.656	4.137.972
Eignir samtals	8.021.939	8.417.936
Eigið fé	2.196.530	2.186.633
Langtímaskuldir	2.212.421	2.224.852
Skammtímaskuldir	3.612.988	4.006.451
Eigið fé og skuldir samtals	8.021.939	8.417.936

- Langtímaskuldir hafa lækkað frá árslokum 2011 úr 2.225 mkr í 2.212 mkr.
- Skammtímaskuldir hafa lækkað frá árslokum 2011 um 393 mkr.
- Vaxtaberandi skuldir námu 3.155 mkr en voru 3.212 mkr í árslok 2011.
- Eiginfjárhlutfall hefur hækkað úr 26,0% í 27,4% í ársfjórðungnum.

Vaxandi hugbúnaðarsala og góður rekstur innanlands

Rekstur Nýherja og dótturfélaga innanlands gekk vel í fyrsta ársfjórðungi og var afkoma yfir áætlunum. Afkoma af erlendra starfsemi var hins vegar umtalsvert undir áætlun.

Aukin eftirspurn eftir tækniþjónustu Nýherja

Tekjur og afkoma Nýherja móðurfélags voru yfir áætlun í ársfjórðungnum. Þjónustutekjur voru lægri en á fyrra ári, en vörusala var góð á fyrirtækjamarkaði. Tekjur af tækniþjónustu Nýherja fara vaxandi á ný og var afkoma Tæknisviðs yfir áætlun í fjórðungnum. Aukin eftirspurn er eftir alrekstrarþjónustu, þar sem Nýherji annast allan tölvurekstur viðskiptavina, gegn föstu mánaðargjaldi. Tæknisérfræðingar Nýherja hafa unnið að ýmsum stórum uppsetningum í ársfjórðungnum, svo sem á IBM, TSM afritunarbúnaði, IBM Storwise gagnageymslakerfi og Office 365 skýlausnum. Verkefni tæknisviðs fara vaxandi og voru verkefni fleiri í mars en nokkru sinni áður í einum mánuði.

Sala á IBM Tivoli lausnum, APC varaafgjöfum og kælikerfum fyrir tölvusali var góð í ársfjórðungnum. Einnig er aukin eftirspurn eftir IBM Power netþjónum og tengdum búnaði. Sala á Lenovo tölvum var um fimmtungi meiri en á sama tímabili í fyrra. Á einstaklingsmarkaði hefur sala á tækniþjónu dregist saman, sem meðal annars stafar af vöruskorti, sem rekja má til náttúruhamfara í Japan og Tælandi á síðasta ári.

Í aprílmánuði flutti Nýherji í nýja og glæsilega þjónustu- og vörumiðstöð að Köllunarklettsvegi 8. Þar eru sameinuð á einum stað vörufgreiðsla, viðgerðarþjónusta og tækjaleiga í um 2.500 fermetra húsnæði og er þar sameiginleg afgreiðsla fyrir þessa þjónustu.

Sala á Tempo hugbúnaði margfaldast

Rekstur TM Software sem sérhæfir sig í vef- og hugbúnaðarlausnum var ágætur á fyrsta ársfjórðungi og voru tekjur og afkoma umfram áætlun og árangur síðasta árs. Tekjur af sölu á Tempo hugbúnaði erlendis margfölduðust og góð verkefnastaða innanlands hefur skilað auknum tekjum. Áfram eru góðar horfur um vaxandi sölu á Tempo hugbúnaði á erlendum mörkuðum, en hann er seldur um allan heim á netinu og hefur verið þýddur á ensku, þýsku, spænsku og frönsku.

Afkoma Applicon ehf., sem starfar á sviði viðskiptahugbúnaðar var lítillega undir áætlun. Á tímabilinu var unnið að fjölbreyttum verkefnum á Íslandi sem og erlendis, en stærsta verkefnið er innleiðing með Applicon í Svíþjóð á SAP bankalausn fyrir sænska bankann Landshypotek. Verkefnastaða á hugbúnaðarmarkaði innanlands er að styrkjast og góðar horfur fyrir síðari hluta ársins.

Góð verkefnastaða í Svíþjóð

Rekstur og afkoma Applicon í Svíþjóð, sem leggur áherslu á þjónustu við banka og fjármálafyrirtæki var í samræmi við áætlanir. Meðal verkefna var uppsetning á Calypso lausnum fyrir sænska banka. Þá er innleiðing á SAP bankalausn fyrir Landshypotek vel á veg komin. Verkefnastaða félagsins er góð og áætlanir gera ráð fyrir áframhaldandi jákvæðri afkomu á árinu.

Lausn frá Applicon A/S tekin í notkun á Sjálandi

Applicon A/S í Danmörku hefur unnið að þróun og uppsetningu á umfangsmikilli lausn fyrir sjúkrahús í rekstri Region Hovedstaden á Sjálandi síðastliðin 2 ár. Lausnin var afhent í fyrsta ársfjórðungi og var tekin í rekstur á sjúkrahúsinu í Herlev, sem er fyrsta sjúkrahúsið af 12, þar sem þessi lausn verður innleidd. Kostnaður vegna þessarar uppsetningar hefur farið mikið fram úr áætlun og valdið tapi í rekstri Applicon A/S. Aðgerðir núverandi stjórnenda hafa miðað að því að tekjur félagsins verði betur tryggðar og dregið verði úr áhættu. Tekist hefur að lækka kostnað af starfsemi og eru því horfur á því að afkoma verði betri á síðari ársfjórðungi.

Jákvæð afkoma var af rekstri Dansupport A/S í Danmörku, sem sérhæfir sig í innviðum upplýsingatæknikerfa. Hægur bati er í eftirspurn hjá meðalstórum og smærri fyrirtækjum eftir tæknibúnaði og þjónustu. Horfur í rekstri Dansupport eru ágætar á árinu.

Horfur

Félagið gerir ráð fyrir að afkoma af erlendum rekstri fari batnandi út árið og að eftirspurn á innlendum markaði verði áfram stígandi, þannig að áætlanir um afkomu ársins muni nást.

Fjárhagsdagatal fyrir 2012:

Áætluð birting árshlutauppgjörs fyrir árið 2012:

27. júlí. Hálfársuppgjör.
26. október. Níu mánaða uppgjör.
30. janúar 2013. Ársreikningur.

Samþykkt ársreiknings

Árshlutareikningur var samþykktur á stjórnarfundum Nýherja hf. 27. apríl 2012. Árshlutauppgjör Nýherja hf. er í samræmi við alþjóðlega reikningsskilastaðla (IFRS-International Financial Reporting Standards). Árshlutauppgjórið hefur hvorki verið endurskoðað né kannað af endurskoðendum félagsins.

Nýherji hf.

Hlutverk Nýherja hf. er að skapa viðskiptavinum sínum virðisauka með þekkingu starfsmanna á upplýsingatækni, rekstri fyrirtækja og þörfum viðskiptavina. Nýherji býður fyrsta flokks ráðgjöf og fagþjónustu á sviði upplýsingatækni og vandaðan tölvu-, skrifstofu- og hugbúnað ásamt traustri tækni- og rekstrarþjónustu. Stöðugildi hjá Nýherjasamstæðunni voru 519 í lok mars. Hlutabréf Nýherja hf. eru skráð í NASDAQ OMX Iceland hf. (Kauphöll Íslands).

Stjórn Nýherja: Benedikt Jóhannesson, stjórnarformaður, Árni Vilhjálmsson, Guðmundur Jóh. Jónsson, Hildur Dungal og Marta Kristín Lárusdóttir. Þórður Sverrisson er forstjóri Nýherja.

Nánari upplýsingar

Þórður Sverrisson, forstjóri Nýherja, í síma +354 893 3630.